

Բանավէճը Կը Շարունակուի

ՆԱՄԱԿ՝ ԱՒՍՏՐԱԼԻԱՅԷՆ

«Մելգոնեան» վարժարանի փակման հարցով մեր թերթին սիւնակներուն մէջ կայացած բանավէճը արժանացած է ո՛չ միայն Մելգոնեանցիներու, այլ նաեւ Բարեգործականի զանազան վարժարաններուն հետ գործ ունեցող մեր ազգայիններուն ուշադրութեան: Կը տեղեկանանք թէ Մելգոնեանցիները «Փրկենք Մելգոնեանը» անուանուած իրենց կայքէջին մէջ տեղ տուած են նաեւ Մարմարա–ի հեռացանցի կայքէջին, որպէսզի համակիրները հետեւին այս նիւթի շուրջ բացուած բանավէճին:

Միւս կողմէ Աւստրալիոյ Սիւնէյ քաղաքի մեր ընթերցողներէն Վարդան Սրկ. Էլմասեանէն ստացանք սրտցաւ նամակ մը, որ գաղափար կուտայ թէ ամենուրեք ինչպիսի տագնապներ ապրիլ սկսած են Բարեգործականի կապուած կամ Բարեգործականի հետ կապ չունեցող մեր վարժարանները:

*

Յարգելի եւ Սիրելի Պր. Ռ. Հատտէճեան,

Մօտաւորապէս շաբաթ մը ի վեր հետաքրքրութեամբ կը կարդամ Մելգոնեան վարժարանի կապակցութեամբ գրուած գրութիւնները: Պիտի ուզէի ձեզի քիչ մըն ալ տեղեկութիւն տալ մեր Սիւնէյի Բարեգործական Միութեան «Ալեքսանոր» Ամենօրեայ նախակրթարան վարժարանին մասին: Այս վարժարանը բացուեցաւ 1990ին 10 աշակերտով որոնցմէ մեր անդրանիկ գաւակը այս դպրոցի առաջին արձանագրութիւնը ունեցողն է: 1986ին ազգային բարերար Պր. Ալեք Մանուկեան 600 հազար ամերիկեան տոլար դրկեց եւ ստով 5 արտավար հողաշերտ գնուեցաւ: Մեր մեծ բարերարը մի քանի տարի ետք 1.000.000 տոլար եւս դրկեց, եւ այս անգամ շէնքը կառուցուեցաւ եւ այդ շէնքին կառուցման զինը բարձրացաւ 2.200.000.000 տոլարի: Նոյն ժամանակ տեղւոյն ժողովուրդն ալ ձեռքէն եկածը ըրաւ նիւթական իմաստով: Յաջորդական տարիներուն աշակերտներուն թիւը բարձրացաւ 65ի, բայց այս 15 տարիներու ընթացքին հոգաբարձութեան կարգ մը սխալ տնօրինութիւններու հետեւանքով այսօր աշակերտութեան թիւը ինկաւ 29ի: Բարեգործականի կեդրոնական վարչութիւնը այս երկու տարիներու ընթացքին Սիւնէյի մասնաճիւղին նամակ ուղարկեց «դպրոցը գոցեցէ՛ք» ըսելով:

Այս դպրոցին տարեկան ծախսն է 200.000 տոլար, կառավարութիւնը իւրաքանչիւր աշակերտի համար 4–5 հազար տոլարի չափ կարելուր յատկացում կ'ընէ եւ ստոր փոխարէն Կեդրոնական Վարչութիւնը «դպրոցը գոցեցէ՛ք» կ'ըսէ: Ի՛նչ դիւրին է, չէ՞, դպրոց գոցելը, փոխանակ հարցնելու տեղւոյն վարչութեան թէ ինչո՞ւ աշակերտութեան թիւը չի բարձրանար: Այս է այսօրուան Բարեգործականի նախընտրած քաղաքականութիւնը: Միւս կողմէ, եթէ դիտելու ըլլանք, Սիւնէյի մէջ Համազգայինի եւ Հայ Կաթողիկէ համայնքի ամենօրեայ վարժարաններէն

իւրաքանչիւրը աւելի քան 200 աշակերտութիւն ունի: Մերիններուն թիւը ինչո՞ւ չի բարձրանար: Չի բարձրանար: Եւ վստահ ենք որ պիտի չբարձրանայ, եթէ այս մտայնութիւնները շարունակուին: Աւելի առաջ Պր. Հայկաշէն Ուզունեանն ալ գրած էր մեր Սիտնէյի Ալեքսանտր վարժարանի կապակցութեամբ, երբ Մելգոնեանի մասին դիտողութիւն մը կ'ընէր: Մամուլին մէջ կարդացի...: Տարիներով Բարեգործականը աշխարհացրիւ մեր ժողովուրդէն միլիոններ առած է իբրեւ կտակ կամ նուիրատուութիւն եւ այսօր ցաւալի է որ աւելորդ դրամ չկայ դպրոցներուն համար ու զանոնք զոցեցէ՛ք կ'ըսեն: Մանաւանդ Մելգոնեանի պէս հեղինակաւոր եւ նշանաւոր հաստատութեան մը պարագային: Ասկէ ետք հայ ժողովուրդը Բարեգործականի կամ նմանօրինակ միւս հաստատութիւններու ի՞նչպէս նոր կտակներ պիտի վստահի, Սփիւռքահայ վարժարաններու ի նպաստ:

Յարգանքով՝

ՎԱՐԳԱՆ ՍՐԿ. ԷԼՄԱՍԵԱՆ (Սիտնէյ)